

絳縣志卷十九

奉政大夫同知銜賞戴花翎山西絳州絳縣知縣加五級紀錄次成都胡延讓

鄉賢傳第二

孔子曰十室之邑必有忠信書稱五善終於旌賢能周書所爲殊厥井疆以表異之也絳縣爲晉國名區經傳所記仕晉諸賢類不詳其里居百里由余仕列國者多產異地焉見晉臣之必出晉產也即使皆晉人豈人人盡絳產乎舊志敘人物舉春秋左氏傳所紀晉臣悉數載入殊乖體例縣志主存遺佚若趙衰韓厥奚待表章 人絳人名姓且不知何爲立傳今第采南絳立縣之後確爲縣人者錄之舊志旁羅絳州平陽人若敬暉程絳縣志

卷十九

鄉賢門

一

元之類一一芟除敘次自宋張觀以下以備鄉賢傳

宋

張觀字思正縣之范柴里人少謹愿好學中服勤辭學科第一授將作監丞通判解州坐失劾鹽池吏降監河中府稅復通判果州改秘書省秘書郎仁宗初遷太常丞擢右正言直史館爲三月度支判官同修起居注改右司諫知制誥判登聞僉院出知杭州還判國子監權發遣開封府事進爲翰林學士知審官院累遷左司郎中以給事中權御史中丞災異求直言上四事一曰知人二曰嚴禁三曰尙質四曰節用河北水又條七事曰導積水以寬播種緩催欠以省禁錮寬刑法

以振淹獄收屯田以罷歸復罷工役以先急務止配率以阜民財通商旅以濟艱食復知審官院遂拜同知樞密院事康定中西兵失利議點鄉兵久不決遂與王巖陳執中俱罷以資政殿學士尙書禮部侍郎知相州徙澶州河壞縣陳埽或請趨北原觀曰太守獨去如州民何躬率卒徒增築之隄完水亦退徙鄆州請弛鹽禁以便民歲免黥配者不可勝計厯知應天府孟州河南府以吏部侍郎兼御史中丞請便郡養父居業以觀文殿學士知許州月餘拜左丞父憂哀毀旣練卒贈吏部尙書謚文孝觀嘗上書願以官授父真宗嘉之以居業爲京官及觀貴居業至大府卿嘗嘉洛山川風物觀買

絳縣志

卷十九

鄉賢門

二

田宅營林樹以適其意蚤起奉藥膳然後出視事未嘗一日廢也閒曠少欲書必楷無一行草仁宗飛白書清字賜之以賞其節云

元

孔錦山字晉望雄勇多智畧善騎射初襲父爵千夫長從征累有功戰於茶山墜馬騰上者三世祖賜錦衣弓矢鞍勒累陞碣門等處鎮守萬戶子禿魯卜有父風次也先不華俱碣門等處副千戶佩虎符

王仲嘉丰姿明秀性好學善談論嘗藏書至萬卷官至海濱鹽使

張仲儀爲杭州路總管府判官稱能吏轉江西行省都使歲饑民將爲變儀單騎出撫復請於省臣發粟賑濟民遂大定擢撫州路總管告歸

明

石堅董封里人洪武十七年歲貢初任齊河縣典史擢行人司行人負忠義饒膽畧永樂時高麗不庭堅抗疏請往平之上問計將安出對曰兵難遙度陛下第命臣臣必有以復陛下上奇其論遂命行堅單騎往面高麗主宣布朝廷威德謂若不服吾當勦滅爾國高麗王笑謂子一人至吾國何敢大言堅曰固知若必殺我但興師來勦若輩不爲齏粉乎高麗主

絳縣志

卷十九

鄉賢門

三

拜服卒不煩一兵以片言警屬國使奉正朔還授按察司副使

王彬陳村里人由永樂丙戌進士任直隸興濟知縣時運河衝決城郭漂搖久難修築彬臨河歎曰天欲溺吾民何如溺我卽投河有門役挽帶隨之越明日漂尸於縣堂冠帶如生濟民感之爲立祠歲時祭禱焉

郭鑑董封里人宣德己酉舉人官廣西道御史出知兗州府加參政銜致仕歸河津薛文清瑄爲題小像贊以杜詩趙抃比之

張環字瑤夫宋莊里人宏治癸丑進士初令直隸棗強縣有廉

名後歷內黃鎮安知縣累官至秦州知州環資性剛方好學不輟門下遊學者甚眾自號曰菜菴子弟連宏治壬子舉人亦任內黃知縣莊簡明決頗著政績後官至甯州知州張廣習義坊人爲人秉性忠厚砥行端方喜施濟樂聞人善爲鄉里所矜式子讓宏治戊午舉人天資敏捷善古文詞尤篤於友愛與兄析產辭多受寡人咸稱之

張體仁廣元孫由貢生任陝西鄠縣主簿初體仁謁選時嘗夢與程夫子同坐及到任廳事前有古槐土人呼爲程子槐始知明道先生亦曾爲是官遂悟前夢每事宗法程子清介有名

絳縣志

卷十九

鄉賢門

四

郭懷義習義坊人長於吟咏好學不倦由貢生歷官蒲城教諭永昌教授師範嚴正多士宗之

任維屏通明坊人性穎悟學問淵博由歲貢任河陰令居官廉正治本經術深得民心歸里後施賑活人無算鄉人皆德之張夢鯨絳縣人官陝西巡撫崇禎二年大清兵分道並進京師戒嚴宣大總督及宣 諸巡撫皆奏請帥師入衛並詔徵陝西諸巡撫統部卒勤王明年春陝西諸路總兵官吳自勉率師勤王所部延綏兵潰夢鯨恚死

張夢鯨字子化陳景里人萬曆丁丑進士任山東臨淄令篤志好學積書萬卷居官亦多善政

王修下柏里人以歲貢歷官文水訓導平順教諭制行端莊舉動不苟年九十餘居鄉猶好學不倦後喬野里蓋大卿官保德州學正歸亦年至九十餘儀貌修整字畫端楷人每並稱焉

續統字正傳通明坊人天資敏慧諸子百家過目不忘年十四補縣學生事繼母以孝聞由歲貢授河南汝州訓導教士子先德行而後文藝講解不倦汝士咸感其教思後轉周府教授會疾作辭歸卒子唐祚拔貢能文克紹家學

吉大來習義坊人學問淵博長於吟咏嘉靖壬午舉人任藍田知縣歸里後創修邑志稱於時

絳縣志

卷十九

鄉賢門

五

郭永固范璧里人萬曆己酉舉人官渭南知縣有惠政改甘泉知縣崇禎間流寇充斥永固憑城接戰手刃二賊賊擁上城遂被殺妻焦氏亦罵賊遇害柩歸至雒川賊黨仍懷舊恨開棺劈尸肝腦俱盡按臣吳牲以聞七年賜祭葬十年贈光祿卿廕一子

呂邦甯鄭柴里人性聰敏幼年卽有文名及長學益進由恩貢任河南封邱訓導啟迪後學循循不厭士被其教者甚多譚登仕馮村里人由恩貢任同州訓導轉泰安教諭擢雒南知縣服官清慎按使張薦於朝有學先性命理究天人不受贊儀不通私謁之語性嗜學嘗以大學配河洛圖書文太青稱

爲眼空千古歸里後遇歲大祲上書汪副使力言煮粥不若給米多所全活平居足不入城市就塾教授從遊者甚眾子田明別有傳

陳讓陳村里人由歲貢任蓋厓訓導遷靜樂教諭大甯都司教授未至任歸性至孝善事繼母學使傅舉德行第一靜樂學宮宅舍久頽讓殫力修葺歸里後值歲祲讓哺饑人瘞齒骼置祭田善舉甚眾卒蓋厓祀名宦縣祀鄉賢

周九官宋莊里人由貢生任太原縣訓導立身嚴正不諂事長官知縣與庠生蘇復生等有隙預爲申文乘夜持詣學廵押九官正色拒之乃止後遷壽陽教諭時值凶荒餓殍載道九

絳縣志

卷十九

鄉賢門

六

官捐俸以贍貧士壽陽士人咸感佩之

任維清通明坊人崇禎閒以貢授永甯訓導端嚴莊重時舉忠孝節義事規切諸生流寇至城破維清罵賊不屈因遇害祀永甯名宦後本縣祀鄉賢

撤君賜字賓王史村里人丰資秀雅爲諸生有聲譽一時從遊甚眾後由歲貢選荊州府訓導時流寇充斥其子弟泣泣勸勿行君賜鞭其手以去旣至任與諸生陳說忠義事亶亶不倦崇禎壬午冬十二月李自成破荊州監司以下皆遁去君賜獨正衣冠端坐明倫堂賊至罵不絕口而死

國朝順治閒崇祀鄉賢十八年荆郡士人請祀名宦

劉養德董封里人由例貢任招遠縣主簿招遠地濱海地多荒蕪養德至任後循行阡陌悉心勸導開墾荒地四十餘頃招撫流離人戶民感其德擢瀋府工正在任勤慎遇事匡諫王以効職忠勤四字賜之以疾致仕歸卒於家

趙養志宋莊里人萬厯閒官潮陽知縣時潮邑土寇出沒民甚苦之養志親至賊穴宣示德威賊眾感服境內由是無患弟養民以吏任良鄉縣丞清勤奉職值歲大祲養民規畫賑務甚有條理民賴以活者甚眾

康兆民馮村里人天性孝友待異母弟友愛尤篤爲弟子員耿介端凝當世咸服其品時史御史宅中嘗有妖爲患兆民至

絳縣志

卷十九

鄉賢門

七

妖卽不見人皆以爲神異實因其平日爲人方正邪不足以勝之也學使舉德行第一子四維別有傳

康四維兆民子崇禎甲戌武進士任西陽河守備遷山西都司僉書累遷廣西掌印後賊兵抵城下四維奮臂巷戰與其妻子俱殉焉

郭帝都畱孟里人縣廩生讀書明大義平居周急濟困見重鄉黨崇禎末流寇蜂起蹂躪縣境帝都督鄉兵禦賊不克被害國朝康熙四十八年祀鄉賢時貢生盧繼芳及尊王里人曹浩均以鄉兵討寇死於難

應奎縣學生幼孤奉母盡孝非禮不爲嘗拾同里人糧銀還

之

國朝

郭自修橫水里人性梗直少讀書卽以忠義自負比膺歲薦授安遠知縣束裝偕二僕就道子弟有請行者不許蒞任後理民事不少懈未二年綱舉目張尋以石城失守調石城甫至而山賊張自聖率眾來攻自修督民守禦久之城破賊已入目修猶立城頭指揮旣而左右悉散遂爲賊執自聖誘以好語逼之降自修端坐大罵不少屈自聖怒手刃於城下邑人哀其忠歛而葬焉康熙六十年孫維屏迎櫬歸石城人郊祭者數十里不絕後祀鄉賢

絳縣志

卷十九

鄉賢門

八

陳所優陳村里人由武進士任陝西甯羌衛守備順治六年大同叛鎮姜瓖擾平陽南境盤踞絳縣優自甯羌歸敷陳國威數其罪狀力諾之賊怒遂殺於縣之柳莊村後祀鄉賢

張養心賀陳里人縣學生幼孤事母馬氏以孝聞賊陷堡母被賊害棄於水中時心被執痛母死非其命號痛不欲生賊念其孝釋之每逢忌辰輒哀號躡踊若初喪者

王天扶史村里人性仁厚四歲喪父比長奉母郭氏至孝母好施扶仰體親志散粟以濟饑民捐貲完人婚葬者尤多子廩監生用亦能承父志族有八旬老婦失明貧不能自存用時給其衣食嘗行過汾河遇有漂溺者用出貲命救已無及因

買棺殮之又捐置宗田以贍族人咸稱其有父風焉
孫尙書范村里人順治六年土賊猖獗縣境母王氏年逾八旬
衰老不能舉動書棄妻子負母逃難行至中途爲賊所執劫
其隨從書依戀老母涕泣哀懇賊欲殺書母以絕其內顧書
冒鋒刃護母願以身代被刃而死賊感其孝因釋其母幼子
奇抱屍而哭三日後面猶如生

馬時泰畱孟里人豪俠好義崇禎末歲大饑時泰出粟以濟窮
餓者又捐地置義塚年至七十不忘兄弟倉時必集兄弟於
一堂率以爲常子機事二親孝與人交必誠信順治六年父
時泰被賊虜機號泣追至中途願以身代賊感其孝父子俱

絳縣志

卷十九

鄉賢門

九

釋後賊圍本莊索食機與之粟百石圍遂解閤莊俱免後知
縣彭敬慕其人寶之鄉飲及卒鄉人俱爲流涕

劉化育永樂里人順治辛丑武進士任湖廣道士泆都司營守
備治兵安民恩威兼濟楚人倚爲長城性至孝順治六年羣
盜數十標掠村落時化育母病篤不能舉動賊至家人悉奔
散化育獨依母傍毫無懼色賊感其孝義歎服而去

尉懷遠長三里人性至孝父病卧床五年懷遠躬侍湯藥衣不
解帶父歿泣血三年未嘗見齒後由武舉任甯波衛守備奉
差領運遇寇同事者皆逃避懷遠獨不懼與其長子生員弼
王拒敵漕糧得以無失嗣因追滅海寇糧盡無援被賊困辱

不屈而死賊投其屍於河時其子弼王從卽投河抱父屍旋
沉旋浮者數四得舟人救乃出旣歿與其弟翼王扶柩歸葬
弼王有勇力性至孝痛父死 國事悲哀廬墓旋以毀卒翼
王亦以孝友稱事寡嫂撫孤姪尤盡其道

原世儒范璧里人望子順治二年拔貢任平海衛經歷時海賊
鄭芝龍犯順世儒將之官有尼其行者曰賊勢方熾盍少待
以避之世儒曰我職雖微固朝廷命官也豈畏賊乎遂行將
至任所遇賊賊逼之投順世儒不屈而死

吉鳴謙字正之習義坊人爲諸生時苦志勵學中順治甲午舉
人出宰夏津涖任後勤農桑禁游惰夏津之民翕然化之又

絳縣志

卷十九

鄉賢門

十

創立義學延名師以課士公餘卽與諸生講求文法多所指
授一時隣邑之士咸聞風而至康熙甲子科入闈分校悉心
披閱得士顏光敷孔興祥等五人皆當世知名士初鳴謙未
入闈時嘗夜夢孔子與顏子列坐孔子撫其背而稱之曰此
子真吾徒也如是者三覺而異之及榜發果有二裔羣相傳
爲異事後以老乞歸里居力行善事鄉人咸感其德

曹天寵郇王里人由歲貢任伊陽訓導遷沁州學正日與生徒
講學不輟所造之士顯達者多沁州武鄉缺宮按使金嘗借
才焉所著有書文時藝藏於家時仇張里侯嘉允由貢官五
臺訓導亦雅意作人士林咸仰戴之歸里後舉鄉飲正賓

李自美字玉林北柳里人順治壬子副榜任江西瑞州府通判先是瑞屬新昌有偽漢時浮糧十餘萬賠累三百餘年民甚苦之自美至以己職司糧務力請於上官乃得除糧民困以甦及歸襤被而行囊橐蕭然壬申歲邑饑自美鬻地以賑鄉里又捐地爲義塚至今猶有稱道其事者

陳所抱陳村里人讓子順治己亥進士初爲長武令地瘠民貧抱至勸以耕織民漸殷實公餘與諸生講學課文士習文風俱爲改觀俸滿擢淮安同知百姓泣送至百里外及到淮安任釐奸剔弊僚屬咸敬憚之時淮民有陳汝漢陳汝白以人命被誣繫獄積年所抱力辯其冤得釋以勞疾卒於官後祀

絳縣志

卷十九

鄉賢門

十一

鄉賢

常自立鄭柴里人容貌奇偉善飲酒氣槩不凡由歲貢任交城訓導循循善誘多所啟迪一時遊其門者咸得成就教子有義方致仕歸兩舉鄉飲正賓季子伸善古文康熙庚午舉人任沙河知縣甫到任值大兵過境伸先請大營得令箭節制以布作馬槽五百其制簡而有法軍民利之以勞卒官

張礪字介石號中峰宋莊里人順治庚子舉人任蘭谿令性仁慈多惠政兩次分校得士十八人皆浙水名宿後將行取礪知止足以疾辭歸士民攀留不得咸作詩歌以紀德政

王積業通明坊人爲人豪俠好義嘗拾途中遺金訪還本主里

中稱之時三間里人郭恩賜亦拾銀五十餘金還人邑令吳俱給扁旌之同時王淵祁國英亦以還金稱義

李穎達睢村人少穎悟讀書能數行下恪遵父教舉動不苟比長益力學有文名中康熙己酉舉人任鎮原令鎮原地處邊郡俗悍民刁命盜案極多穎達多方整頓案牘漸少又爲之編里甲平徭役鎮原人感之爲建坊立碑以誌其德穎達長於文鄉墨爲海內傳誦所著文稿頗有行世時其族李瑄篤學勵行由丁卯舉人官應州學正亦摻尙廉介勤於造士云楊呈芳庠生性孝友立品端方尤好施與歲饑煮粥以贍窮餓又設義館令貧乏之子就讀其中多所成就

絳縣志

卷十九

鄉賢門

十三

譚田明字見甫登仕子歲貢生年十二入縣學有名於時讀書能會其要長詩古文詞舊志纂修多出田明手所著書頗多今不存子璿衡縣學生亦能文爲人謹愿嘗於永樂村南卜葬其親鄉人以有礙風水告璿衡卽移葬於村西之祖塋人咸服其長厚

柴之棕北續里人縣學生性仁厚樂施濟歲有荒歉則出貲粟以賑貧乏同里有高復台者少孤有志向學之棕助之資令讀書得成名後復台早夭存問其子嘗於荒年過洛下見有鬻妻者之棕出金完其夫婦生平義行大率類是子帝蔭監生克繼父志賑荒貸乏施德於鄉捐金開絳翼接壤山路以

利行旅建續魯峪橋四十餘處夏拆冬修歲以爲常遠近賴之又修曲沃交裏橋一時名公當事咸有題贈里人感其父子爲立碑記事詳通志時又有馮范里人高鸞亦好義創建續魯石橋捐田爲義塚又出粟百石以賑荒邑令陳旌其門曰倡義善士

任珩字摺九通明坊人由庠生入監敘州同職銜事繼母以孝聞康熙三十一年歲大饑珩出粟煮粥全活無算平居周急濟困著有義聲

范繼純事繼母孝父母歿廬墓三年子章亦至孝母病革水漿不入口哀毀以卒與母同葬

絳縣志

卷十九

鄉賢門

三

陳禔媯陳村里人縣學生事母孝平日急公好義順治初寇盜未靖爲鄉人患禔媯調練鄉兵以備不虞盜悉遁去同里子弟有游惰者必教責之又禁止村中演劇以省靡費歲饑煮粥施米以賑貧乏睦嫻任郵善舉爲多子生員雷交出爲弟後亦好施不吝教其二子力行善事

白玉梁畱孟里人家貧力田以養親兄玉璽買遷久不歸母病命之尋兄玉梁至南陽與其兄歸早間山行遇盜玉梁素有膂力欲與鬪恐傷其兄乃舍行李而去行半里雷電交作電光中忽見一虎兄弟共相祝曰甯噬我玉梁以身庇兄少頃有執鞭者成羣而來虎卽去得以無害歸至家母病危篤醫

藥罔效玉梁割股以進病遂愈玉梁未嘗學問孝友之行本於性生嘗購

上諭十六條注釋見其易曉每向閭巷中言之將卒前一日預知如期果驗後史村里人王自忻亦以割股聞

王大任東廂坊人儀表魁偉勵志好學緣屢躋文場改習騎射康熙丙午鄉試中式武舉以親老不求仕進親歿哀毀骨立撫五歲幼弟自髻鬣及成人恩勤備至終身不分爨周急好施荒歲煮粥活人不少吝惜性耿介雖居城市無事不造公門以故當事咸重之年逾八十以壽終

王錫東廂坊人家貧孝友父聘士授沙泉同心二驛驛丞錫徒

絳縣志

卷十九

鄉賢門

十四

步從之未半年聘士歿錫典衣裝以殮復號泣歸里盡產以迎襯時沍寒同心守備蕭請俟春且代乞賻卹錫力辭卽日就道晝則繩繫柩躬自挽夜則露宿柩側而號抵家墜指裂頸無復人形見者胥酸鼻母喬氏卧病一年侍奉尤力比歿祔父墓慟幾絕從弟瑛臻幼孤不能自活錫字之俾胥有室邑令盧將表之以勵俗固辭雍正八年旌表入忠孝祠仲子體中亦以孝友著

陳佐周陳村里人年十五父所性卒哀毀甚非杖不起所性係選貢五經諸史胥有論著佐周見父手澤輒涕泣不止事母李氏不命之退不敢退母或譴責必跪受湯藥必親嘗嘗徒

步百里延醫遇盜將殺之忽虎出叢簿間盜駭遁虎亦逡巡去母歿寢柩次三年不入室嘗建家廟刻族譜人胥謂克守家學雍正八年旌入忠孝祠

馬化祥字虹宇史村里人好善樂施嘗客高平時有爲虎所斃者屍骸暴露母妻無依化祥出金殮葬之且卹其家孫紹融邑廩生性穎悟少卽知名善詩詞工書法惜以天卒從弟宗援太學生亦工書法善篆隸

史宗逸仇張里人以增廣貢爲人慷慨明於大義樂施與康熙辛未年蝗蝻爲害民餓饉宗逸出粟以濟鄉里計口授倉本莊人多所全活並將各村暨垣曲地內租銀概免之處里黨

絳縣志

卷十九

鄉賢門

五

和藹可親遇事必爲之分解以故三十餘年鄉鄰未嘗有爭鬪事

曹際烈尊王里人監生性友愛撫五歲孤弟成立眠食與共教養備至康熙五十九年歲大荒際烈出雜糧三百餘石以贍鄉里又於倉封寺煮粥賑饑時戚友稱貸八百餘金際烈悉舉券焚之未嘗掛齒頰焉

任儉通明坊人由吏任清河典史操尙廉潔不爲苟取有善政清河人愛之爲作德政歌再任諸暨亦得民心儉雖由刀筆然性仁厚好行善事置義田建家廟他如資婚助葬義舉不少嘗念城關考試者眾其中貧富不一因捐置資本令官舖

交代凡城關人試卷槩不給價勒碑以垂永遠至今猶被其利云

賈師聖字仰止史村里人武生家素封樂於施濟有公事必勇往無少推諉康熙辛丑壬寅間連遭大荒民不聊生師聖出粟煮粥以救窮餓又嘗於南陽捐地一頃爲會館公費鄉人感之爲立碑記後以子凝吉官贈中憲大夫

賈田聖史村里人由監生授州同職事繼母孝待幼弟克敦友愛善治生以勤儉起家然能好禮鄉里有急難必爲周助無少吝康熙辛丑壬寅歲大荒由聖出粟煮粥嘗捐義倉穀二百石邑令詳請題敘生平善事如建義學施藥餌等事尤著

絳縣志

卷十九

鄉賢門

六

後舉鄉飲疊膺 綸誥族人庠生永揚亦出粟賑荒爲善於鄉里人皆稱之

范加玉晉南里人居家孝友好行善事有鄰人張耀久出不歸其母與弟欲嫁其妻其妻泣將自盡加玉聞之卽以己衣質銀假作耀書送至其家云耀在某處後年餘耀果歸夫婦由是完聚弟加榮辛苦力作撫其姪讀書成名恩義兼至

郭百仞字鳳崗紫家里人恩貢生事父母以孝聞父病黃疸醫家謂宜忌鹽百仞不忍獨令父淡食已亦不食鹽一年母患瘡百仞以口吮其濃血遂得愈生平好學不倦讀書必求其要旨尤喜引掖後進家雖貧然樂施予稷人張堯母子客死

其莊百仞嘗殯葬之

賈從聖史村里人性好義勇於爲善康熙六十年歲大祲煮粥賑饑兼給粟銀又嘗焚券人咸感之子凝禔貢生精岐黃術尤喜利濟凡就醫者既不索謝復予以藥嘗慨然曰人不爲良相當爲良醫其自負如此己卯歲大饑絳尤甚凝禔於族里之貧者按口給銀所費不下數百金河東觀察以睦嫻任郵旌其門

賈連葉史村里人自少苦志讀書爲諸生有名屢躡場屋乃援例入貢授州司馬職嗣母王氏矢志守節連葉侍養能得其歡爲請旌建坊以遂顯揚之志居家敦雍睦撫孤姪教養備

絳縣志

卷十九

鄉賢門

七

至慷慨好施出粟散金澤及鄰里嘗捐義倉穀五百餘石以備荒歉邑令舒褒之事載碑記

靳至人永梅里附貢讀書能得大旨砥行立名勇於爲義鄉黨中有事必爲之分釋施金疏渠爲闔村利捐義穀賑饑民所費粟以百計絕無所靳河東道嘗給扁以旌其行

曹鶴徵遇異人授鍼法沉疴宿疾應鍼而起四方至者戶外屢常滿年九十有八歲精神彌旺通志載藝術門

白雲字從龍畱孟里人乾隆癸未歲貢植品端方積學淵博好大小歐陽體遂爲名筆邑令王欽其品學延至文昌宮設教從遊者多所裁成年八十餘猶孜孜不倦舊志多雲手筆所

著詩古文詞至今仰爲山斗

陳夢說初名夢月字象臣號曉巖陳村里人生於垣曲劉張村十歲隨父返里讀書能知大義工詩古文詞見者咸許爲大器二十二歲補縣學生中乾隆丙辰恩科舉人戊辰科進士補刑部主事遷員外郎郎中兼辦河南安徽司並提牢聽遇事勤慎明允長於折獄王大臣稱爲賢員後轉禮部郎中遲羅入貢奉

旨伴送貢使入粵海六閱月而覆

命著入粵紀事一書次

年補浙江甯紹台道得同鄉官伙助而後到任其爲京官之廉可知矣在任革陋規察奸吏惠黎民凡有修塘修城修船

絳縣志

卷十九

鄉賢門

六

大工役大疑獄上憲皆委辦決之而法外施仁如梅監生歐官一案曲宥其少子台人德之演劇爲存孤記以傳其事

高廟南巡

召見西湖

行宮

天語褒獎賜帛貂鼠

荷包等物後轉糧儲道簠簋清飭而漕運無虧嗣以公罪鐫一級調用督撫奏畱辦理城工一年後歷署府篆遵例捐復原官回籍自十四年離鄉至此二十六年而歸宦囊所餘買田三百餘畝課子孫耕讀居家十年七十一歲卒其所著書爲榮錫堂稿鐫版存其家

譚守業柏封里人由吏員任陝西關中州吏目在任之日儉約自奉妻親炊爨以廉潔稱

郭匡字步衡冷口里人乾隆己未進士任福建沙縣令聽斷明允以清廉著名

譚彛柏封里人幼聰慧工書法讀書以理學爲先授提督軍門正黃旗教習所著有河洛發揮圖

郭銘字彛鼎橫水里人康熙庚子舉人任湖南平江縣令甫下車捐俸救災邑人感惠後改授襄陵教諭一以作人爲己任登第者累科不絕

撤夢元字春堂喬野里舉人任餘干知縣賦性廉毅好讀書不樂仕宦解組後設教梓里英俊多出其門家稍儲糧喜施濟其童年塾師王志鉅故爲師母歲供貲粟以終老凡里人多

絳縣志

卷十九

鄉賢門

九

受顧恤所著有訓蒙四十藝改政十藝聲調譜行世

張維揚字宣武習義坊人歲貢教生徒勛以實行好大家古文詩辭舊志多其所訂乾隆三十四年督理城垣指畫工程會計明確工竣有餘金散還各鄉邑人感之

陳崙觀陳村里人州同職性至孝好施濟事繼母徐恪奉子職母病親侍湯藥衣不解帶者數月嘉慶九年頻饑米貴如珠捐米數百石全活甚眾篤友于之誼嚴義方之訓後弟對觀舉孝廉子愈燿選優貢

張展翎字雲翼宋莊里人增生重眞品崇實學無事不出家塾凡脩金貧富概不全收計足日用之費而已有附文於諸生

課藝後者一例批閱不問爲誰受業至三百餘人而英雋得名者過半著有四書講章以俗語道文言理解最晰子而敬而義孫瑞達累葉書香

郭其炳字虎文橫水里人附貢生性孝友事孀母飲食供奉必躬與親一飯不及則憂形於色與弟從九其忻同居終身怡愉相對數十年如一日且寡言笑不濫與人交里有遊蕩者見炳輒爲斂迹遇疑難事炳至一言立決鄉黨咸重其人

賈宗洛字文川史村里人任山東鹽運濱樂分司運同洛祖凝端由庠生候選詹事府主簿仗義好施邑令李創建華靈書院費三千金端獨任之邑人感德與李並祀生祠洛父鐘琳

絳縣志

卷十九

鄉賢門

三

任湖北荊州知州署安陸府知府洛不逮事父母祖母李守節撫孫至於成立性至孝人以晉李密擬之致仕歸凡邑有裨民社事無不踴躍赴功時重建考院修葺聖廟姜嫄祠華靈書院北義溝橋並創建荆姚鎮玉皇閣山水橋皆洛捐資督理居東省尤多創立後以軍功加知府銜生男六長驥次駟咸豐壬子聯登鄉榜

王廷幹通明坊人乾隆乙卯舉人由介休教諭推陞大同教授性周摯善作人經其訓誨者多獲大成

馬麟鳳字海洲史村里人歲貢性質純篤髫年卽好讀書事父母曲意承志以孝著名居鄉儀表端肅邪行者多畏避之處

家塾三十餘年雖祁寒盛暑不閒課程工書法授徒不專尙文藝以修行勵品爲先好施濟親族有急不以貧辭著有先儒祀典起講詳解弟子規行世

陳廷璋字潤圃更名里廩貢生軍功議敘修職郎善事父母克篤宗支尤勤於學母病必親侍湯藥晝夜不眠嘗爲從堂兄償逋負二百餘金族叔有貧而無子者給地二十餘畝以爲養設教鄉塾不受脩金年逾六旬猶孜孜不倦云

張星煥更名里人由附貢捐訓導職翰林院星燦弟賦性慷慨居東省甚久咸豐年間賊匪東擾充紳舉團弁捐多金蒙獎武功將軍銜兼旌子百戶職後旋里傳其居東時所鐫書籍

絳縣志

卷十九

鄉賢門

三

甚夥又弟星煒在家刊散善本萬篇周急濟貧類多德行周世禮字敬侯宋莊里人由附貢捐布政司經歷家僅中資渾厚好施咸豐六年饑出粟賙鄰里不足糴市以繼之後逢歲歉遂爲常每歲暮身帶粟票銀票以給窮乏凡親友婚葬無力者必以貲助至登門告艱尤厚貺之人稱爲周善人

任思鈞通明坊人由本縣城守司陞交城把總秉性忠貞嘗自負曰大丈夫戎馬疆場雖馬革裹尸亦其分耳適山東賊匪作亂奉檄從軍奮不顧身屢立奇績後因寡不敵眾爲賊所傷奏

聞祀本州昭忠祠

鄭之鉅字汝霖尊王里人從九品銜嘉慶九年爲合族出銀二百兩置義田令族眾經理營積益田畝以爲族人婚葬無力者助後有餘金創立義學不足仍出資補之歿後族眾豎碑以紀其義

周守身字體全宋莊里人性聰悟年十三母遭癱疾身進膳烹藥七年無倦色母卒哀葬盡禮夙以侍疾廢學心常病之殯後執書問字遂精星命之學尤善風鑑請相地者輒驗年七十三自推流年歎曰今夏其終乎子商於外呼之歸出一卷授之乃自擇葬日也寢疾四日而歿

郭舒紫家里人乾隆歲貢有孝行當父病解館歸侍湯藥必親

絳縣志

卷十九

鄉賢門

三

嘗之衣不解帶者數月比父故哀毀盡禮半月閒鬚髮半白不入私室者三年事繼母迎意旨承色笑曲盡子職又仇張里武生董大用李燦春青凌里王清源永梅里陳祥雲賀大里張治禮范璧里增貢柴庚辛永梅里貢生李應時人咸以孝稱之

席滿澤青凌里人八品義官職孝弟繼世寬忍傳家子孫累葉能奉祖訓自明嘉靖至國朝道光年間十世同居家屬至五十餘口鄉里稱善

李燦任村里人居澗東乾隆乙卯山梁圯燦慨出囊金補葺之乙巳督建佛殿施車道於莊西以通行嘉慶戊午歲饑出粟

濟貧惠及鄰莊時有官莊村請旌於縣令蘇以德洽里黨褒之燦孫峩觀字我山性嗜學入庠出貢頻叨鄉薦設義學於華岩洞四方從遊甚眾由是澗東遂以我山馳名

王元魁字殿一范璧里人增貢生居心公正賦性溫和每爲人排解咸佩服悅從嘗慨施水地六畝永爲村人守門之資

常天賜鄭柴里人弱冠事母以孝聞母嘗病欲食肉時賜無錢割股以奉聞於邑令給純孝性生扁以旌之

楊次中字執甫賀大里人增貢生賦性鯁直不畏強暴大交地連三界前多豪棍小經紀人往往受其把握次中嚴行彈禁強豪斂迹至今鎮人賴焉

絳縣志

卷十九

鄉賢門

三

撤曜喬野里人歲貢生性嗜學工文藝尤善書法所著有敬修文行世

郭定域紫家里人歲貢生幼聰慧髦尤好學賀學政甄拔十英名列第四

樊森然字絳山尊王里人歲貢生選忻州訓導著有樸園遺稿王維城通明坊人生平豪俠好義饒有膽畧咸豐三年粵匪到村搶掠城與同里王三錫操兵力拒膊背受傷奮勇不怯

任恤

任爲舟通明坊人居心忠厚鄉里有急每慷慨以濟之嘉慶年間薦饑人多餓斃舟出粟賙之鄉里多所全活被其惠者爲

豎麥舟遺風碑

王步雲字從龍青凌里人嘉慶十年歲饑舉村請貸約年豐歸還慨如眾請後乃邀眾謂曰諸君所借豈望還哉舉所記簿焚之

趙爾熾永梅里人監生嘉慶間歲饑賑村眾糧百餘石後亦舉單焚之

亢吉祥字恆瑞尊王里人乾隆年間歲饑出粟百餘石賑濟鄰族其同里耆賓曹德遠亦出粟賑濟

柴思誠字純如范璧里人軍功議敘州判加州同職性篤厚勇於行義濟困扶危絕無吝惜嘉慶間川楚軍興慨然曰我輩

絳縣志

卷十九

鄉賢門

三

百有餘年得以安居樂業者皆國恩也遂輸餉三千金繼連遭荒旱傾囊糴粟計口授食事竣焚其券邑宰鄭題心存任恤扁獎之

靳碩德字藝林青凌里人由國子監典籍議敘布政司經歷道光二十六年歲饑散粟賑濟同治六年捻匪擾境被害者向德求助無吝意精岐黃術凡求醫者輒予以善樂概不受謝王鑑字寶三青凌里人議敘鹽課司提舉以子家賓晉贈通奉大夫幼失怙道光丙午歲饑鑑方弱齡慨出多穀賑濟村人咸豐三年粵匪犯境鑑募丁壯數十夫巡護村莊賴以安堵王象賢通明坊人州判職嘉慶甲子歲饑出粟賑濟姪瑞年庠

生捐金置田設義學賑飢亦如象賢人咸稱之

馬邦本字近山雷孟里人拔貢生任五台縣教諭賦質明敏學業篤實爲諸生時七列優等五次冠軍解組後髦而好道所著有四書集鈔註解工董趙書法遠邇獲其筆迹者寶之王承祚橫水鎮生員平生教授生徒多所成就康熙間歲大饑市集廢焉祚約同人議復舊規一時米粟雲屯遠近於是乎咸賴鄰鎮有忌者百方阻之祚周旋其閒務盡規復一切而後已至今鄉里便之爲豎感德碑

趙維藩字錦屏長三里人拔貢生性穎悟經史百家過目輒成誦從遊數十人多所成就尤踴躍赴公累邀獎敘同治丁卯

絳縣志

卷十九

鄉賢門

三五

粵賊擾境單騎前往曉以大義鄉里得安堵焉村人感之立石以紀其事

范玉銘北續里人性純孝幼侍父客直隸虜於賊銘哀籲伏地曰若舍吾父雖萬死不辭也叩頭流血扛之不去賊義之嘗於途捨遺幣悉歸其主歲饑有郭芝年者不克自存將退其聘妻議成矣銘憐而貲之俾成夫婦

張位中賀大里人從九輕財仗義官廳圯落出百金修之鄉里子弟多窮困無力就傅捐田十餘畝立義學村人感其惠泐石於道

喬長林習義坊人家貧業賈撫幼弟以養以教弟傲惑於婦言

強與析居長林給薪米一如疇昔其友于之誼至今稱焉
殉義

郭金鐸冷口里人同治六年捻匪擾境鐸隘路遇賊執農器憤
與敵賊恚立時斃之又同里郭懋學亦詈賊同時遇害

王心田留孟里人咸豐三年粵匪過莊田女避居樓上賊至女
墜樓自殞田亦遇害又城關朱長雍王奎斗宋雷均與焉

李善義東冷口人同治六年捻匪擾境義憤與賊敵賊受傷聚
眾殺義邑令陳有碑誌其里